

Oqaasiliortut ataatsimiinnerat
Pingasunng. septembarip 21-anni 2011, nal. 13.30 Ilimmarfimmi /
Oqaasileriffimmi.

Peqataasut: *Carl Chr. Olsen, Stephen Heilmann, Lotte Holm, Karl Møller.*

Peqataannngitsut: *Johannes Jeremiassen, Eva Møller-Thomassen (pissuteqarluni)*

Ataatsimiinnerup aallaqqaataani najuuttut:

William Kriegel aamma Flavia Lyberth, Kommuneqarfik Sermersooq

Oqaluuserisat:

1. Tikilluaqqusineq aamma ilisimatitsissutit

Siulittaasoq tikilluaqqusivoq ilisimatitsissutigalugulu **Kommuneqarfik Sermersuumi atorfillit** William Kriegel aamma Flavia Lyberth oqaaseq *pisortaq* pillugu paatsuungassuteqarlutik saaffiginnissimmata ataatsimiinnerup aallartinneranut aggersarsimallugit. Aggersut pappiaqqamik agguaassipput nassuiaatigalugulu siusinnerusukkut atorfinnut taaguutitut Oqaasiliortut suleqatigalugit suliarineqarsimasut saniatigut suli taaguusersuinissamut akunnattooruteqarlutik.

Assersuutigalugu *Afdelingsleder* taaneqartarpoq *Immikkoortortaqarfimmi aqutsisoq*. Taamaattoq *Daginstitutionsleder* Oqaasiliortut suleqatigalugit taaguuserneqarsimalluni *Meeqqeriviup pisortaa*. Pisortaq direktørimut taaguutaariarluni *Fagchef* taaguuserneqarsimavoq *Ingerlatsisoq*. Taaguutip pisortap assigiinngitsunik atorneqarnera pissutigalugu nalornisoornarsilersimavoq *Områdeleder/dagtilbudsleder* kalaallisut qanoq taaguuteqassanersoq taamatuttaaq *Pædagogisk leder*.

Oqaasiliortut siulittaasuannit ilisimatitsissutigineqarpoq taaguutit sammineqarneranni qullersaqarneq allersaqarnermillu eqqarsartarneq pinnagit suliaaqaarsimasut (hierakiskimik).

Siulittaasup tulliata tamanna isumaqatigaluarlugu paatsuungasoqarnera paasisinnaanerarpaa, ilaatigullu aalajangikkat paasissutissanik

naammattunik pilersorneqaqqaarsimanani aalajangiiffigineqartarneri eqqarsarnartoqartut unnerlugit. Tamatumunnga LHO isumaqataavoq.

Aalajangertoqarpoq taaguutitut paatsuungassutaasut saqqummiunneqartut eqqartorneqaqqissasut isummerfigineqassallutillu tulliani ataatsimiinnissami.

Siulittaasup ilisimatitsissutigaa immik. 7-imi taasariaqartuni allani **Inuit Aqqinik Akuersisartut** suleriaasiannik allanngortiterisinnaanermut isumaliuutini Oqaasiliortunut isummerfissanngortillugit saqqummiutissamaarlugit.

2. Kingullermik ataatsimiinnermit **imaqarniliap akuerineqarnera**

Naqqiissutit ilanngullugit akuerineqarpoq. Siulittaasumit ilisimatitsisutigineqarpoq allattaasitaami aalajangersakkat naapertorlugit nunanut taaguutitut –*miu* uiggiunneqarsimatillugu naqinneq angisooq atorineqartassasoq, s.i. Amerikamiu, Nunavumiu, taamaattoq norskeq il.il. naqinnermik mikisumik allanneqartassasut.

SH apeqquteqarpoq imaqarniliani naapertorlugit ataatsimeeqateqatigissallugit aalajangikkat pisimanersut. Tamatumunnga siulittaasoq naaggaarpoq. Tassunga ilanngullugu SH 70-iliinerminni Oqaasiliortunit tunissutisisimanini qujassutigaa.

3. **Seniorbruger** kalaallisut (09.09.2011)

Oqaasiliortunut ilaasortat saaffiginnissutigineqartoq naammattumik paasissutissanik aallerfigineqaqqaarani apuunneqarsimammat isummerfigisinnaanagu unnerput, sumullu atuisuunersoq paasisaqarfigeqqaarlugu isummerfigisinnaagamikku *tulliani ataatsimiinnissamut sammisaq kinguarateqqaat.*

4. **Ilerasuutigaakka – Ernumagakka – Uisanguserneq** (09.09.2011)

Steen Egedep oqaatsit ilerasuutigaakka aamma ernumagaakka pillugit saaffiginnissutaa eqqartorneqartillugu Oqaasiliortunut ilaasortat isumaqataapput *ilerasuut* aamma *ernumaneq* assersuutitut atugaani **isummamikkut paarlangasumik atorineqartut**. SH-p oqaatsinik taamatut atuineq oqaatsit isumaannit ilisimasaqanngissusermit pissuteqarnerarparaa, assersuutigalugu ukiuni kingullerni *qanilaassuseq* atorineqarnermigut isumaviata atorineqarnera nikikkiartulersimasoq. Qanga inuk nipaarloq, maniguuttoq qanilaartumik taaneqartaraluartoq maanna pallimasumut, qanittumut isumaqartinneqalersimavoq. *Ilerasuttoq* tassaavoq *nalunngeqatiginnissutsikkut ajornartoortoq nammineq iliuuseqarsimanini qanigisamiluunniit iliuuserisimasaa pissutigalugu uffa ernumasoq tassaasoq annilaangasoq/sioorasooq*.

Oqaaseq *uisanguserneq* stressimut assersuutigalugu saaffiginnittup atugaa pillugu erseqqissaasoqarpoq Oqaasiliortut *stress* kalaallisut ima taaguuteqassasoq qangalili aalajangersimagaat *uippakajaarneq*. SH-p maluginiaqquaa *uisakajaarneq* allaammat. Maluginiarneqarportaaq *uisaruserneq* ilaatigut sumiorpaluutiniusimagunartoq atorineqartartoq.

**Oqaasiliortut aalajangerput saaffiginnittumut missingersuusiamik
Oqaasiliortut ilaasortaannut qimerluugassamik akissusiortoqassasoq.**

5. ***Pisortanit attaveqarmut attavinnik kiffartuussissutinillu elektroniskiusunik nioqquteqarnermut akuersissummik peqartunut naatsorsuusiornernut malittarisassat pillugit nalunaarutip kalaallisuaa***

5b. ***Telemi naammagittaalliortoqarnerani aalajangiisartut suleriaasiat pillugu Nalunaarutip kalaallisuaa***

Eqqartugassiatut ingerlateqqinneqarsimasut taakku pillugit Oqaasiliortut akornanimmi oqallisingaatsiarput. Aperisoqarpoq Oqaasiliortut kukkunersiuneq nutserinerlu suliassarineraat. Siulittaasoq akimmat ingammik inatsisissat nutsernerisa pitsaassusii qulakkeerneqarniassammata Oqaasiliortunut suliassanngortinneqarsimasut, siulittaasup tullia ilaasortallu isumaqarput

aqqutissaq pitsaanerpaaq tassaassasoq nutserisarnermik kukkunersiuisarnermillu pisinnaasallit akilerlugilluunniit suliasmik suliarinnitseqqaarlugit, aatsaat sapernartortaat tunngaviusumillu isummerfissartaat Oqaasiliortunut ingerlateqqinneqartassasut.

Tamanna tunngavigalugu Oqaasiliortut isummerput aqqutissaq taanna atoreerpat **suliakkiussat tunngaviatigut isummerfissaajumaagassat Oqaasiliortunut suliakkiunneqassasut**. Taamaattoq kukkunersiukkat ilaasortat ilaasa suliarisimasaat suliarereersimammatigik nutsikkamut tassunga naqqiutitut ilanngunneqassasut.

6. *UV stråler - qinngornerit ersinngitsut* (20.09.2011)

Siulittaasup ippassaammat tusagassiortoq Judith Hard Peilmann sianersimanerarpaa ukioq manna paarnat iluamik naasimannginnerat qinngornerit UV-nik taaneqartartut (ultraviolette stråler) pissutaanersut pillugu aallakaatitassiulernerminni isumasiorsimagaani. Tusagassiortumut siunnersuutigisimavaa *qinngornerit ersinngitsut*. Oqaasiliortut UV stråler ima taaguuteqassasut aalajangerput: **seqernup qinngorneri ersinngitsut**.

7. **Taasariaqartut allat**

Naak **Inuit Aqqinik Akuersisartut** sulinerat ajunngitsumik ingerlagaluartoq naapitsinniarnert aalajangiiniartarnerallu Oqaasileriffimmit sullissisunut ajornakusoortarpoq. Allaat manna tikillugu suli siulittaasussamik qinersisinnaasimanngillat ukioq aallareriitsiartorli ivertinneqaramik suli tamakkerlutik ataatsimiissinnaasimannginnamik. Tamanna pissutigalugu Oqaasiliortut siulittaasuat tunngaviusumik isummertoqassatillugu siulittaasugallartutut inissisimasariaqartarpoq. Siulittaasup Oqaasiliortunut ilaasortanut isumaliutigeqquaa qanoq issanersoq ilaasortaat pingasuusut marlunnik ilaqqinneqarpata. LHO-p siunnersuutigaa qaammammi ulloq aalajangersimasoq toqqarneqarsinnaasoq ilaasortat pilersaarusiornerminnut eqqumaffigisinnaasaat.

**Oqaasiliortut aalajangerput tulliani ataatsimiinnissamut
eqqartugassanut isumalioqqusissut tamanna ikkunneqassasoq.**

Kommuneqarfik Sermersuup Tunumi oqaatsit kulturillu pillugu

aaqqissuussinera. LHO ilisimatitsivoq taamatut aqqissuisoqarsimasoq namminerlu Tunumiut oqaasii pillugit saqqummeeqqusaasimalluni. Piffissalerneqarnini ilimagisaminit sivisunerusimagaluartoq saqqummiineq pitsaasumik ingerlasimasutut nalilerneqarpoq. Neriunnerarpoq tulliani taammaattoqassappat aaqqissuussineq pitsaanerujumaartoq.

SH ilisimatitsivoq e-mailimik tigusaqarsimalluni novembari qaammat Nunani Avannarlerni aaqqissuussamik ataatsimiisitsisoqassamaartoq **“Synlig politik – usynlig sprog”**-imik qulequtalimmik. Aperaaq allat tamatuminnga ilisimasaqarnersut. Siulittaasoq akivoq ataatsimiinnissaq tamanna Nordisk Sprogrådimit, maanna Nordisk Sprogkoordinationimik taaguuteqalertumit aaqqissuussaasoq. Taamatuttaaq ilisimatitsivoq qinersivimmi maani nammineq Ane Marie Sakariassenilu IKIIN-imeersoq toqqagaasimallutik. SH oqarpoq nammineq ataatsimiinnermut najuunnissamut aamma soqutiginnissinnaalluni.

Tulliani ataatsimiinnissaq

Aalajangerneqarpoq pissasoq **oktobarip 13-ianni nal. 10.00** Oqaasiliortut ataatsimiittarfianni.

Inussiarnersumik inuulluaqqusilluta

Carl Chr. Olsen
Siulittaasoq

Nuka Møller
Allatsi